

## Evening Dogri (NSD) Bulletin 05-04-2024

### आकाशवाणी

खास खबरां ...

- 1 मुख्य चुनां आयुक्त राजीव कुमार होरें मुनिसिपल आयुक्तें ते जिला चुनां अफसरें गी मतदाता शमूलियत गी बधाने ताई बूथ-बूथ उप्पर सिलसिले वार कार्य योजना बनाने दे निर्देश दित्ते ।
- 2 भारतीय रिजर्व बैंक नै लगातार 7मीं बारी बी रेपो दर च कोई बदलाव नेई कीता ऐ ।
- 3 वरिष्ठ बीजेपी नेता ते प्रधानमंत्री नरेन्द्र मोदी होरें अज्ज आक्खेआ जे समूलचा देश विकसित राष्ट्र बनने दे धेइयै उप्पर कम्म करा'रदा ऐ ।
- 4 दिल्ली न्यायलय नै मुख्यमंत्री अरविंद केजरीवाल हुंदी याचिका जेहदे च अपने कनूनी वकीलें कन्नै मिलने दा समा बधाने दी याचिका उप्पर आदेश गी रोकी दित्ता ऐ ।
- 5 भारतीय मौसम विभाग नै अगले दऊं दिनें लेई तटीय भारत ते समूलचे पूर्वी हिस्से च गर्म हवाएं चलने दी पेशनगोई कीती ऐ ।

<><><><><><>

### ECI Meeting

मुख्य चुनां आयुक्त राजीव कुमार होरें मतदान फीसद गी बधाने आस्तै चुने दे जिले दे म्युनिसिपल कमीशनरें ते जिला चुनां अफसरें गी मतदान केन्द्रें स्हाबै कार्य योजना तैआर करने दा निर्देश दित्ता ऐ । उनें शैहरी ते ग्रामीण क्षेत्रें आस्तै बक्ख-बक्ख कार्य नीतियां बनाने लेई आक्खेआ । मुख्य चुनां आयुक्त होरें नमीं दिल्ली च उनें चुने दे राज्यें दे म्युनिसिपल आयुक्तें ते जिला चुनां अधिकारिं कन्नै बैठक कीती जित्थें पिछले चुनावें च मतदाताएं दी शमूलियत घट्ट ही ।

बैठक दा मकसद 2024 दे लोकसभा चुनाएं च मतदान फीसद बधाना ऐ। कुमार होरें अधिकारिएं गी इस चाल्ली कम्म करने दे निर्देश दित्ते जेहदे राएं मतदान लोकतंत्र दे महापर्व च हिस्सेदारी करियै मान मसूस करै। उनें नेह जतनें दी अपील कीती जेहदे कन्ने लोक मतदान आस्तै आपूं प्रेरित होन। उनें आक्खेआ जे पिछले चुनां घट्ट मतदान आले 215 ग्रामीण ते 51 शैहरी संसदीय क्षेत्रें दी पंछान कीती गई ऐ, जित्थें मतदाताएं दी हिस्सेदारी बधाने दे जतन कीते जांगन। एहदे आस्तै उनें त्रै-मुखी रणनीति अपनाने पर जोर दित्ता, जेहदे च मतदान केन्द्रें पर सुविधा बधाना। लक्षित ढंगै कन्ने मतदाताएं तगर पुज्जना ते लोकें गी प्रोत्साहित करने आस्तै महत्वपूर्ण पक्खें गी शामिल करना।

<><><><><><>

## RBI-Repo

भारती रिजर्व बैंक नै लगातार 7मीं रेपो-दर च कोई तब्दीली नेई कीती ऐ। बैंक दे गवर्नर शक्तिकांत दास होरें अज्ज बडलै अद्ध-मासिक आर्थिक नीति दी घोशणा करदे होई दस्सेआ जे रेपो-रेट साढे 6 फीसद गै रौहग। उनें आक्खेआ जे 2 जहार 24-25 ब'रे दरान सकल घरेलू उत्पाद दी विकास दर 7 फीसद मित्थी गेदी ऐ। पैहली तिमाही च एह दर 7 फीसद दूई तिमाही च 7.1 फीसद, त्रीय तिमाही च 7 फीसद ते चौथी तिमाही च बी 7 फीसद गै रौहग।

<><><><><><>

## PM-Rajasthan

भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होरें आक्खेआ जे अज्ज पूरा मुख्य राष्ट्र गी विकसित बनाने दे धेइयै कन्ने कम्म करा'रदा ऐ। पिछले 10 ब'रें च उंदी सरकार नै आम लोकें दी जरूरतें जेहड़ी जे दाहके थमां पेई दियां हियां गी पूरा कीता ऐ। श्री मोदी होर अज्ज दपैहरी राजस्थान दे शेखावती खित्ते दे चुरु च बीजेपी दे मेदवार दे हल्के च इक जन बैठका गी संबोधत करा'रदे न। उनें आक्खेआ जे पिछले 10 ब'रे च विकसित भारत दी नींह

तैआर कीती गई ऐ। अज्ज सारा विश्व हैरान ऐ जे कियां भारत इन्नी तेजियां कन्नै प्रगति करा'रदा ऐ। उनें आक्खेआ जे 10 ब'रे पैहले देश निराशा च डुब्बे दा हा। सत्ता च ओने दे परेंत उंदी सरकार इमानदारी नै कम्म कीता ऐ ते अज्ज देश तेजी कन्नै प्रगति करा'रदा ऐ। उंदी सरकार दिएं बक्ख-बक्ख योजनाएं दे बारे गल्ल करदे होई श्री मोदी होरें गलाया जे उनें हर घर तोड़ी मिशन मोदी उप्पर आम सहूलतां जियां जे मकान, शौचालय, घर तोड़ी पीने आला पानी दी उपलब्धता जकीनी बनाई ऐ। इत्थें तक्कर जे कोरोना काल च बी देश विश्व च 5मीं सब्बने शा बड्डी अर्थबवस्था बनी गेआ। पिछले 10एं ब'रें च कीते दे कम्में दे बारे गल्ल करदे होई उनें गलाया जे एह अज्ज शुरूआत ऐ ते देसै च औंदे समें च बड्डे कम्म बी अजें करने बाकी न। विरोधी पार्टिं दी नुख्ताचीनी करदे होई उनें गलाया जे जिसलै फौज सज्जिकल स्ट्राइक करा'रदी ही, बरोधी पार्टियां सबूत मंगा'रदियां हियां।

<><><><><><><>

## Delhi Court-Kejriwal

दिल्ली न्यायलय नै अज्ज मुख्मन्त्री अरविंद केजरीवाल हुंदे आस्सेआ दित्ती दी इक दरखास्त जिस च उनें उंदे वकीलें कन्नै कनूनी मताबक दा समा बधाइयैहफते च 2 थमां 5 बारी करने दे बारे फ़ैसले गी रोक़ी दित्ता ऐ। राउस एवीन्यू न्यायलय दे विशेष जज कावेरी बवेजा होरें इस मामले कन्नै सरबंधत आदेश गी 9 अप्रैल दी तरीक तैह कीती। सोमवार गी न्यायलय नै मुख्मन्त्री केजरीवाल होरें गी कथित आगकारी नीति घोटाले कन्नै सरबंधत गैर कनूनी पैहे दे लैन देन दे सरबंधें च 15 अप्रैल तोड़ी न्यायिक हिरासत च भेजेआ हा।

<><><><><><><>

## ECI-Atishi

चुनां आयोग नै अज्ज आम आदमी पार्टी नेता ते दिल्ली दी मंत्री आतिशी होरें गी उंदे आस्सेआ इल्जाम लाने जे उनेंगी अपना सियासी भविक्ख बचाने लेई भारतीय जनता पार्टी च शामिल होने लेई संपर्क कीता गेआ हा, उप्पर अज्ज इक नोटिस जारी कीता ऐ। उनेंगी अपना जवाब सोमवार दपैहरी तोड़ी देने लेई आक्खेआ। नोटिस च आयोग नै आक्खेआ जे मतदाता अपने नेताएं आस्सेआ जेहड़ा किश बी सार्वजनिक मंच उप्परा आक्खेआ जंदा ऐ, ओहृदा विश्वास करदे न ते उंदे ब्याने राएं प्रचार उप्पर असर पौंदा ऐ। चुनां आयोग नै आक्खेआ जे मेद ऐ जे आप नेता आस्सेआ दित्ते दे ब्यान तत्थें दे आधार उप्पर होग ते जिसलै उंदे आस्सेआ ब्यानें दी सच्चाई गी परखेआ जा तां उंदे कोल अपने ब्याने दे समर्थन च तत्थे होने लोडचदे न। एहदे कोला पैहले बीजेपी नै आतिशी खलाफ इल्जामें उप्पर इक शकैत दर्ज कराई ऐ।

<><><><><><>

## UGC-Technology

विश्व विद्यालय अनुधान आयोग यूजीसी नै सब्बै उच्च शिक्षण संस्थानें गी विद्यार्थिं च मानसिक स्वास्थ्य सरबंधी मुफ्त हैल्पलाइन दी उपलब्धता दे बारे जानकार ते जागरूकता बधाने दे निर्देश दित्ते न। आयोग नै सब्बै यूनिवर्सिटिं दे वाइस चांसलरें ते सब्बै कालेजें दे प्रिंसिपलें गी इक सर्कुलर च आक्खेआ जे स्वास्थ्य मंत्रालय दी टैली मानस मानसिक स्वास्थ्य हैल्पलाइन अपने शुरू होने कोला बड़ी गै बेहतरिन ढंगै नै चला'रदी ऐ ते इस सेवा दी जानकारी सब्बने तोड़ी पजाने दी लोड ऐ। आयोग नै उच्च शिक्षण संस्थानें गी टैली मानस हैल्पलाइन दा प्रचार प्रसार करने दी गुजारश कीती ते आक्खेआ जे एह सेवा मुफ्त ऐ ते 24 घेंटें उपलब्ध ऐं इस पैहल दी शुरूआत स्वास्थ्य ते परिवार कल्याण मंत्रालय आस्सेआ 2022 च विश्व मानसिक स्वास्थ्य दिवस दे ध्याड़े होआ हा। इस पैहल दा मकसद मासिक स्वास्थ्य सरबंधी परेशानी कन्नै परेशान जनता गी 24 घेंटे आली सेवा च मदद करना ऐ।



## India-Bangladesh Trade

औंदे ईद—उल—फितर ते पैह्ला बैसाख दे मौके पर 8 अप्रैल थमां इक हफते तोड़ी भारत बंग्लादेश बश्कार माहाधीपुर—सोना—मसजिद—जिमीनी बंदरगाह राएं बपार उप्पर रोक लाई दित्ती गई ऐ। बंगाली कलैंडर मताबक पैह्ला बैसाख म्हीने पैह्ला ध्याड़ा ऐ जेहड़ा जे बंग्लादेश दी अधिकारिक कलैंडर ऐ। तोआई जमीनी बंदरगाह राएं यात्रुएं दी आओजाई सामान्य दिन दे स्हाबै गै होग ते यूनाइटेड न्यूज़ ऑफ बंग्लादेश मताबक सोना मसजिद जमीनी बंदरगाह सी एंड एफ अजेंटें संगठन दे अध्यक्ष नै इस समाचार दी पुष्ठी कीती ऐ। उनें आक्खेआ जे इस जमीनी बंदरगाह राएं 15 अप्रैल थमां बपार परतियै शुक होग ते भारत दे माहाधीपुर जमीनी बंदरगाह निर्यातक संगठन गी बी इस लेई जानकारी दित्ती गई ऐ। उनें एह बी आक्खेआ जे बपार दी रोक दे बावजूद यात्रुएं दी आओजाई चैक पोस्ट राएं रोजमर्दा दे तौरा पर गै होग।



## IMD

भारतीय मौसम विभाग नै अगले दऊं दिनें लेई समूलचे पूर्वी हिस्से ते तटवर्तीय इलाकें च लूह आले हालात होने दी पेशनगोई कीती ऐ। लूह आले हालात अज्ज ते कल ओडिशा, पच्छिम बंगाल, झारखंड, महाराष्ट्र, कर्नाटक, आंध्रप्रदेश, पुडुचेरी ते तेलंगाना च बने दे रौहगन। मौसम विभाग नै आक्खेआ जे कल तोड़ी तटीय कर्नाटक ते गोवा च गर्म ते उमस भरोचे दा मौसम रौहने ते इयै नै हालात केरला, तमिलनाडू ते पुडुचेरी च इस म्हीने दी 9 तरीक तोड़ी बने रौहने दी पेशनगोई कीती ऐ। तोआई पूर्वोत्तर भारत च इस म्हीने दी 9 तरीक तोड़ी बरखा ते गरज—चमक दी बी पेशनगोई कीती गई ऐ। मौसम सरबंधी अजेंसी नै आक्खेआ जे अगले 7एं दिनें दरान असम, मेघालय, नागालैंड, मणिपुर, मिजोरमख त्रिपुरा, अरुणाचल प्रदेश सिक्किम ते पच्छिम बंगाल च हल्की थमां दरमेयानी दर्जे

दी बरखा कन्नै गरज-चमक, बिजली चमकना ते अंधी झक्खड़ चलने दी बी पेशनगोई कीती ऐ। इयै ने हालात कल झारखं डते ओडिशा च बी बने दे रौंहगन। पूर्वी भारत च बी अगले 7एं दिनें दरान जम्मू कश्मीर, लद्दाख, हिमाचल प्रदेश ते उत्तराखंड च बी हल्की बरखा ते बर्फबारी दी पेशनगोई कीती गई ऐ।

<><><><><><>